

## KERATAN AKHBAR

---

TARIKH : 24 NOVEMBER 2022  
AKHBAR : HARIAN METRO  
MUKA SURAT : 24

### Pertumbuhan KDNK perlahan pada 2023

## Pertumbuhan KDNK perlahan pada 2023

**Kuala Lumpur:** RAM Rating Services Bhd (RAM Ratings) mengunjurkan pertumbuhan Keluaran Dalam Negara Kasar (KDNK) Malaysia lebih perlahan pada 4.0 hingga 5.0 peratus pada 2023.

Permintaan dalam negeri akan kekal sebagai pemacu utama pertumbuhan tahun depan, disokong oleh pemulihan berterusan dalam pasaran buruh dan langkah sokongan dasar sedia ada.

Ketua Penyelidikan Ekonomi RAM Rating, Woon Khai Jhek berkata, pertumbuhan cemerlang Malaysia pada 2022 sepatutnya menyediakan asas yang kukuh untuk pertumbuhan dalam 2023 yang mencabar, walaupun lebih perlahan.

"KDNK Malaysia setakat suku ketiga 2022 berkembang sebanyak 9.3 peratus tahun ke tahun dan kami menganggarkan pertumbuhan setahun penuh mencecah 8.2 peratus.

"Disebabkan oleh ancaman kemelesetan global yang semakin hampir, ekonomi Malaysia pasti

akan menghadapi risiko penurunan tahun hadapan.

"Malaysia tidak dapat lari daripada kesan daripada pertumbuhan ekonomi global yang lebih perlahan tahun depan, yang secara langsung akan menjejaskan permintaan luar dan melembapkan permintaan eksport Malaysia," katanya pada webinar bertajuk *Economic Outlook 2023: Choppy Waters Ahead?*

Menurutnya, tekanan harga yang ketara dan dasar monetari lebih ketat berkemungkinan akan melembapkan perbelanjaan pengguna.

"Inflasi keseluruhan dijangka kekal tinggi pada 2.7 peratus pada 2023, walaupun ini masih tertakluk kepada perubahan dasar dalam subsidi domestik dan harga komoditi global tahun depan.

"RAM menjangkakan sekurang-kurangnya kenaikan 25 mata asas dalam OPR pada 2023 untuk mengembalikan kadar dasar ke paras prapandemik 3.00 peratus," katanya.